

Inatsisissatut siunnersuummut nassuiaatit

Nalinginnaasumik nassuiaatit1. Inatsisissatut siunnersuummut tunuliaqutaasoq

2006-imi ukiakkut ataatsimmiinnermi inatsisissanut siunnersuutit pingasunik saqqummiussinnermi (Akileraaruserinermik ingerlatsineq pillugu Inatsisartut inatsisissaannut siunnersuut UKA 2006/29, Aningaasarsianit akileraarutit pillugit Inatsisartut Inatsisissaannut siunnersuut UJA 2006/30 aamma Inatsisartut akitsuutit il.il. pillugit inatsisaasa ilaasa allanngortinnerat pillugu UKA 2006/30) naatsorsuutigineqarsimavoq sulisitsisut akileraarutinut A-nut atatillugu nalunaaruteqartarnerat taakkunanngalu akiliuteqarnermikkut isumannaarisarnerat, akileraaruserinermik ingerlatsineq pillugu Inatsisartut inatsisissaattut siunnersuummut, UKA 2006/29-imut nalinginnaasumik nassuiaatini "Aningaasaqarnikkut allaffissornikkullu inuussutissarsiuteqartunut sunniutaasut" pillugit immikkoortoq naapertorlugu, siuartinneqassasut.

Sulisitsisut sulisoqarnermut akitsuut pillugu paasissutiissiinerat akileraarutinik A-nik unerartitat pillugit paasissutiissiinnermi immersugassaq atortagaq aamma atorlugu pissaaq, taamatullu aamma akitsuutinik isumannaarineq akileraarutit A-nik akiliuteqarnikkut isumannaarneqarneranut atatillugu pissalluni. Taamaammat siunertaaqqaarsimagaluarpoq sulisoqarnermut akitsuut pillugu Inatsisartut inatsisissaattut siunnersuutip ukiakkut ataatsimiinnermi (UKA 2006/9) appassaaneerutaasumik suliarineqarnerani paasissutissanik tunniussisarnerup taakkunanngalu akiliuteqarnikkut isumannaarisarnerup siuartinneqarnissaannik allannguutissamik siunnersuummik saqqummiussineqassasoq. Tamannali assut ajuusaarnartumik kukkunikkut pinngitsoorpoq.

Matumani siunnersuut aningaasarsianit akileraarutit pillugit Inatsisartut inatsisaannut allan-nguutissatut Inatsisartut inatsisissaattut siunnersuummut atatillugu isigineqassaaq.

2. Inatsisissatut siunnersuutip imarisai

Siunnersuutigineqarpoq sulisoqarnermut akitsuut pillugu paasissutissanik tunniussisarnerup aammalu taakkunanga isumannaarisarnermut piffissaliunneqartup siuartinneqarnissaa.

Paasissutissanik tunniussisarneq

Sulisitsisup sulisut akissarsiaasa allagartaannik sanareernermini, sulisitsisup paasissutissanik sulisoqarnermut akitsuut pillugu nassuiaammik sananermut atorneqartussanik pigisaqareertarput.

Taamaammat suliffeqarfiup suliata aqqissuunnissaannut periarfissaqarnissaa naleqquttumik sianigalugu paasissutissanik taamaattunik tunniussinissap siuartinnissaa akornutissaqanngilaq.

Paasissutissanik maannamumiit siusinnerusumik tigusaqarneq akileraaruseriffimmut annertuumik iluaqutaassaaq, tamatumuuna akileraaruseriffik paasissutissiissutinik pineqartunik amerlaqisunik pissarsiarineqartartunik nalunaarsuineramik suliarinninnermillu sulianik aqqissuussinissamut pitsaanerujussuarmik periarfissaqalissammat.

Ataatsimut isiginnilluni Naalakkersuisut naliliipput, sulisoqarnermut akitsuut pillugu paasissutissanik tunniussisarnermut piffissarititaasumik siuartitsinerup sulisitsisumut pitsaaqutai ajoqutissaasunit annertuumik amerlanerussasut, paasissutissanillu tunniussinissamut piffissaliunneqartup sulisitsisut il.il. naammaginarfumik asattuukkai.

Akiliuteqarnikkut isumannaarininnissamut piffissaliussat

Akiliinissamut piffissaliussap siuartinneqarnissaa pillugu siunnersuut aningaasarsianit akileraarutit pillugit Inatsisartut inatsisaata allangortinneqarnissaanut siunnersuummut attuumassuteqarpoq, tassuunatigummi akileraarutit A-nik kiisalu iluanaarutisianit atuisinnaanermullu akiliutinit akileraarutitik akiliiffissaq siuartinniarneqarmat kingusinnerpaamikqaammammi akiliiffissap ulluisa 20-anni pisussanngorlugu.

Sulisoqarnermut akitsuut akileraarutinit A-nut qanittumik atasuummat sulisitsisumut eqqaamajumarnerussaaq sulisoqarnermut akitsuutip akilernissaanut isumannaarinissamut piffissaliussaq ataasiinnaappat. Taamaattumik akiliuteqarnikkut isumannaarinissamut piffissaliunneqartoq ataasiinnaappat ilimagineqarsinnaavoq akiliuteqartitsinikkut isumannaarinissamut piffissaliunneqartumik qaangiisarnerit tamatumanilu ernialiisarnerit ikinnerulernissaat ilimagineqarsinnaavoq.

3. Aningaasaqarnikkut allaffissornikkullu pisortanut sunniutissai

Siunnersuut allaffissornikkut aningaasaqarnikkulluunnit pisortanut annertunerusumik sunniuteqartussasut naatsorsuutigineqanngilaq.

4. Aningaasaqarnikkut allaffissornikkullu inuussutissarsiuteqartuusunut sunniutissai

Sulisitsisut sulisoqarnermut akitsuut pillugu paasissutissanik tunniussisarnerata siuartinneqarnera aammalu isumannaarinissamut piffissaliunneqartup ullut qulit missigisaannik siuartinnera, sulisitsisut akiliisinnaassuseqarnerannut 5 procentimik

erniaqartitsineqartillugu ukiumut 50.000 koruunit missaanniittunik nammagassiisuteqartussatut missiliuutigineqarpoq.

5. Avatangiisinut pinngortitamullu sunniutissai

Siunnersuut avatangiisinut pinngortitamulluunniit tunngasutigut sunniuteqartussaangilaq.

6. Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqartussaangilaq.

7. Nalagaaffeqatigiinnermut namminersulivinnermulluunniit tunngasut

Siunnersuut naalagaaffeqatigiinnermut namminersulivinnermulluunniit attuumassuteqanngilaq.

8. Pisortanit soqutigisaqatigiiffinnillu tusarniaaneq

Siunnersuut KANUKOKA-mut, Kalaallit Nunaanni Sulisitsisut Peqatigiiffiannut (GA), ILIK-mut. Nunaqavissut Suliffiutillit Kattuffiannut (NUSUKA), Sulinermik Inuussutissarsiuteqartut Kattuffiannut (SIK), KNAPK-mut, Aningaasaqarnermut Pisorta qarfimmu, Sulisoqarnermut Pisorta qarfimmu, Selsakbinut allattoqarfimmu, Inuussutissarsiutinullu Pisorta qarfimmu tusarniassutigineqarsimavoq.

Tusarniaanermut akissutit Akileraartarnermut Akitsuusiisarnermullu Ataatsimiititalimut ingerlatinneqarput.

Tusarniaanermi akissutit allannguuteqartitsinissamut tunngavissinngillat.

Aalajangersakkanut ataasiakkaanut nassuiaatit

§ 1-imut

nr. 1-imut

Siunnersuutigineqarpoq qaammammi pineqartumi akissarsiat akitsuusigassat katinnerinut taakkunanngalu akitsuummumut tunngatillugu nalunaarummik tunniussinissamut ulloq kingulleq piffissaliunneqartoq qaammammi tulliusumi ullut qulingannut aalajangersarneqassasoq. Qaammammi nalunaarfissami ullut qulingat arfininngorneruppat, sapaataappat nalliuttuuppalluunniit, nalunaarummik tunniussinissamut piffissaliunneqartoq ulluinnaasumut tullermut kinguartinneqassaaq. Taamaasilluni ulloq nalunaaruteqarfissaq siuartinneqarpoq, taanna ullumikkut piffissap akitsuusiiffissap qaangiunneranit qaammammi ulluinarmi kingullermi piffissaliunneqaraluarpat.

Akitsuummik akiliuteqartussaataasoq akileraaruseriffimmiit
nalunaaruteqarnissamut allattuiffissanik nassinneqarumaarpoq.

nr. 2-mut

Siunnersuutigineqarpoq sulisoqarnermut akitsuummik piffissaagallartillugu
akiliiffissatut kingullertut piffissaliunneqartoq qaammammi akiliiffissaasumi
ulluinnarnit kingullerpaamiit 20-nianut siartinneqassasoq. Qaammammi
akiligassanik isumannaariffiusussami ullut 20-at arfininngoruneruppat, sapaataappat
nalliuttuuppalluunniit akiliinissamut piffissaliunneqartoq ulluinnaasumut tullermut
kinguartinneqassaaq. Taamaasilluni ulloq akiliiffissaq kingulleq siuartinneqarpoq,
taanna ullumikkut qaammammi ulluinnarmi kingullermi piffissaliunneqaraluarpat.

Piffissaagallartillugu akiliuteqartoqanngippat, suliffeqarfik akitsuummik
akiliuteqartussaataasoq qaammatip aallartinneri tamaasa 1 procentimik ernianik
akiliuteqartinneqartassaaq, taamaattorli minnerpaamik 500 koruuninik, qaammatip
akiligassanngorfiata aallaqqaataaniit, takuuk akileraaruserinermik ingerlatsineq
pillugu Inatsisartut inatsisaanni § 43.

Assersuutigalugu suliffeqarfiup akitsuummik akiliuteqartussaataasup aatsaat
akitsuut januaarimut attuumasutilik ullormi 15. martsimi akilerpagu, suliffeqarfik
qaammatinut februaarimut aamma martsimut ernianik
akiligassiissuteqarfigineqassaaq. Erniat akiitsuusut qaammammik kingumoortumik
immikkut akilersinniarneqartassapput. Erniat landskarsip pisassarivai.

§ 2-mut

Siunnersuutigineqarpoq Inatsisartut inatsisaat 1. januar 2008 atuutilissasoq.